

呂
子
評
語

呂子評語正編卷二十七

孟子公孫丑下

孟子曰天時不如地利章

嘗與友人言。秀才不會應變處事。只是窮理工夫缺欠。纔講作用便非。孔子曰我戰則克。豈作用之謂也。孟子此章正要如此看。蘇老泉好談兵。著權衡各十以儼孫子。此意便低。若如宋襄公不鼓不成列。而公羊以爲雖文王之戰不是過。亦真腐儒之論耳。

故曰域民不以封疆之界節

封疆正所以域民。山谿正所以固國。兵革正所以威天下。不以云者。正非弛關去險銷兵之謂。只要人和得道乃可耳。

黃淳耀文經營天物者。必收億兆之心。駕馭羣雄者。務集區中之

勢云云。此策士謀併之言。非孟子所謂得道也。天時地利人
和三者。皆策士之說。孟子就其中取人和之說。以發明本論。但
策士所講人和。都是五霸假之爲招徠籠絡之術。非孟子所意
之人和也。故孟子特下得道二字。見人和之本。謂得王者之道
實能發政施仁也。得道者自多助。不是要多助而求得道。這些
子上便是王霸之分。而作爲亦別。於此不清楚。正墮策士權謀
圈積中。此漢唐之所以終不能返於三代也。陶菴喜史學。習于
功利作用。故未免夾雜。

以不忍人之心。行不忍人之政。是則所謂得道。孟子一生宗旨也。
陳臥子文直以奸雄權詐作用當之。正與孟子作敵矣。

多助之至二句。止是申論多助義無兩層。

附此章文

大賢以王道言兵。凡言兵者皆訕矣。夫天時地利固戰勝之具也。而必勝不如人和。人主可不思得道以致之哉。且天高地下。人生其間。紛爭而不得和。而戰之事以起。而所以戰之術以深。凡皆以求勝也。然有百戰百勝而不勝之理。自在。及未嘗一戰而必勝之理。又自在。豈其爲術特殊與。抑求勝於戰之內。不若求勝於戰之外也。求勝於戰之時。又不若求勝於戰之先也。自君子不言戰。而天下之言戰益多。自天下爭言戰。而君子之言戰益少。遂疑天下之不善戰者莫君子若矣。而吾謂天下之至善戰者則莫如君子。何則。天下求勝於戰之內與戰之時。則曰天時。曰地利。曰人和。君子求勝於戰之外與戰之先。則曰得道。天。下言天時。言地利。亦言人和。其視人和。猶之乎天時地利也。先有一必戰之意。以求人和。故生聚教訓之法。霸者用之。屢盛而

屢衰其盛者人和也其衰者不得道之人和也君子言得道亦言人和其視人和非猶夫天時地利之人和也先有一不戰之意以求人和故仁漸義摩之事王者用之愈隱而愈顯其隱者得道也其顯者得道則人和而天時地利亦環至而立效也自天下言之天時地利人和無異也而吾以爲大異也天時雖精等而下之至不得與地利等地利雖險推而上之亦僅可與天時抗以言乎人和則皆不如也夫六神七殃不廢吉凶伊闕孟門不棄形勢然人和可以得天地而天地不可以得人和也不然以弱小而或受久遠之圍以富強而僅效堅壁之計宜多易奏之功矣而不勝者如是委去者如是則何故哉謂其不如誠哉其不如也自君子言之人和其要也而吾以爲尤有要也天下誰能助我者而自我多之則已不勝其多天下誰非助我者

而自我寡之。則并不止於寡。惟至於得道。則無不勝也。夫關梁要害。不忘修謹。稱干比戈。不廢明威。然人和而有不恃之地利。亦得道而有不求之人和也。不然。以仇敵而生肘腋之中。以腹心而望河山之外。宜多相悖之理矣。而所順者如是。所畔者如是。又何故哉。謂其必勝。誠哉其必勝矣。蓋天時地利。亦爲有國之需。而得道人和。自具兼收之效。則天下之至善戰者。尚有過於君子哉。孔子曰。我戰則克。蓋得其道矣。

孟子將朝王章

不得已而之景丑氏宿焉節

堯舜之道。全從此心做出。君不能致敬於臣。則不尊德樂道。不足與有爲。臣不致敬於君。則不能陳善閉邪。格君心使之正。此二典。開口便說欽哉也。孟子之不敢陳非道。此心便是致君堯舜。

之本。方見不敢與下敬字中內聖外王體用具在。

平生本領只一箇堯舜之道。守堯舜之道只一箇敬字。故曰道三仁與不仁而已。是舍却仁義便都是非堯舜之道也。不以此事君卽賊其君。是不陳堯舜便敢於賊也。故此二句不獨指一時敬齊宣云然。是孟子一生學問事功俱在裏許。

龍文

非其道也。聲色貨利之私。凡可以陷溺其心者。衆有口

而莫能防。云云。**龍**非道不陳。是反激語。以起下敬字。此寔講得

除仁義二字外。凡爲富強功利一切淫辭邪說。生心害政者。都

是非字中眷屬。都是拂性蔽聰之說。非字不敢字。更字字著實。

文學孔子之祖述。既不得不有他途並進之憂。欲齊王如反手。

又不得不有抵掌侯王之事。**龍**語錯入枉尺直尋去。一見諸侯

而大以王小以霸。且以爲不可。若欲齊王而不得不抵掌侯王。

然則趨朝又何害。不幾反與章意相左乎。此亦不過做陳于王前四字。而下語稍不照管。便有病。

美廷樞又不陳堯舜之道。必有非堯舜之道以佐其邪。而一陳非堯舜之道。反或借堯舜之道以文其說。**國**楊墨同非桀紂。陸王亦稱孔孟。新莽荆公亦說周禮。

非字要看。此一字中有許多功利縱橫邪說在。

不敢中有許多委曲。陳字中有許多責難。陳閑作用。

一邊陳堯舜之道。所以責難。一邊卽不陳非堯舜之道。所以閑邪。兩路並到。責難中有無數法則。閑邪中亦有無數門庭。法語與言。潛移默奪。可知孟子有多少苦心大用。

敬王不是說王就是堯舜。定做到堯舜。看王便當堯舜。如此說卻。是褒獎尊頌。乃後世之敬。非孟子之所謂敬也。自己實見得君。

非仁義不可。仁義非堯舜不至。不敢不以此陳告。陳者陳其道。非以堯舜相奉也。此方是責難陳善之敬。

道對王便是堯舜。卽是諛語。道料王不能到堯舜。便非責難。看後云見王退而有去志。則齊宣之不合也久矣。

曰豈謂是與節

分明說尊有三意中卻只有一。分明說各自爲尊。意中卻互相爲尊。三字中有平勢。又有側勢。方得孟子當下語脈。

孟子未嘗輕爵也。但爵止居其一耳。

呆講爵尊不得。竟說爵不尊亦不得。重說朝廷不得。輕說朝廷亦不得。只於朝廷下加一則字看。便字字靈活矣。

講德字。須見鄰國學問源流。人但以功效設施作夸大語。只說出俗儒一肚皮寒乞相來。非孟子之所謂德也。

人亦知以爵齒形德。然爵齒中又有賓主。爵爲德之對。齒卻是德之佐。彼爵齒同貶者粗矣。

故將大有爲之君節

文南英文大有爲之君。蓋嘗卑身戢翼。以觀天下之變。**文**漢唐英雄行徑。豈可與語尊德樂道之君。**文**視其臣皆吾平昔等夷。而常以握手定交。結草莽之知。**文**一發與尊德樂道無涉。纔著此見。定到殺戮功臣矣。**文**其君臣所蚤作而夜思者。固不必公庭之是谷矣。**文**如此則非則就之。乃或就之耳。不知不召之臣。乃師傳。非佐相功臣也。大有爲之君。其所謀卽王道仁政之事。非陰謀秘計也。就之乃尊德樂道。以師禮事之。非脫略儀節以示契密爲英雄作用也。此文全不道著。只演得一齣雪夜訪趙普耳。

湯之於伊尹節

惟有不可召之臣。故君不敢召。

景丑以不敬責孟子。孟子正以不敬責齊王。則不敢召。何其敬也。責難陳善。亦正孟子之敬王也。

管仲二字微讀。看得管仲一文不直。下不可召。說得管仲崖岸斯然。中間且猶兩字。躍然而出。

亦非極詆管仲。總要跌醒。且猶二字耳。

孟子之平陸章

黃淳耀文距心何罪。皆齊王之罪耳。詎亦是各當其罪。距心烏得無。但須分首從耳。

衰亂君臣。大約情相欺。過相委耳。孟子兩說。能使各正己罪。其義正在不相借處。謂大夫之罪本于王。推勘未嘗不是。然有失出。

處不見聖賢義例之精細矣。

然則子之失伍也亦多矣節

陳子龍文脈卹者救荒之末策也。至論文惟人主於平時慎選循良假之事柄使之勤心於田疇耕稼以阜其源而又精計於貴賤盈縮以制其變雖遇凶歲可無飢民矣何必遠恃人主之帑哉。評極是然須從人主正心誠意親君子遠小人始不然也難。

曰今有受人之牛羊節

則必兩字緊接上受字來只好於未受前審度不得于既受後商量。

求收與芻應無不得而字一轉頓然色沮故而字前極鬆活而字一轉便窘而字前極擺脫而字一轉便呆其呆且窘者無他只

要逼出反諸其人一條生路與他耳。

天下大禍皆釀成於巧宦士大夫但講做官不復知有百姓使人君但講財利不復知用救民之官以致生靈塗炭害貽君國皆立而視其死一法爲之。

附此節文

齊臣自有得爲之責。罕譬焉而知愧矣。夫大夫則未有所得爲者也。非反諸其人。卽立視其死。收且有然。而曰爾何無罪與。嘗謂國家受才臣之患。不若受庸臣之患深。何則。才臣之患在敢爲。天下共見其喜功之多敗。故雖有可原之心。而其罪彰。庸臣之患在不敢爲。天下且共白其尸位之無他。故雖有甚深之禍。而其罪隱。夫庸臣亦不自意其至此也。惟避害之計切。而匡濟之術無聞。持祿之念深。而進退之義不立。故阿世苟容。其患甚。

於殘忍刻薄之所爲。而庸臣之學術。長爲厲於民生國步之間。以平陸大夫論。有大夫所得爲者焉。有大夫所不得爲者焉。有大夫所不得爲而自有其得爲者焉。而大夫槩曰。此非距心之所得爲也。嗟乎。其果無所得爲也哉。夫老羸之轉。有轉之者也。壯者之散。有散之者也。此非大夫之所得爲也。然有所得爲者。在未轉與散之先。卽老羸之轉。雖欲不轉焉而不可得也。壯者之散。雖欲不散焉而不可得也。此真非大夫之所得爲也。然不得爲而自有其得爲者。在旣轉與散之際。當未轉與散之先。固有爲之求之一法焉。蠲租賑恤之德。沮格於下施。亦請之之無術也。悉草野之隱微。而呼號爲可信。審政府之通計。而措置爲可行。豈非所得爲者乎。而大夫曰否。此未知服官之難者也。有成例焉。不可以瀆告。有上旨焉。不可以逆撓。於是舉其不欲求

與不善求之私而并責其罪於朝廷。則求之一法廢矣。然既轉與散之際。尚有反諸其人之一法焉。貪殘刻吝之政。因循於已壞。亦爭之之無人也。不以膏脂事權貴。則去就可輕。不以催科博殿最。則進退自裕。豈非不得爲而自有得爲者乎。而太夫曰。否。此未盡仕宦之巧者也。將沽名乎。無以保首領。將植節乎。無以長子孫。於是隱其不肯反與。惟恐反之意。而盡諉其罪於功令。則反之一法又廢矣。譬之爲人牧焉。既不求夫芻牧。又不反其牛羊。主者不以爲非。牧人不以爲疚。齒骼蔽野。寵眷不衰。僚友徒屬。轉相秘授。蓋自受事之始。以迄報績之終。獨有立而視其死之一法爲極良耳。言及此。距心之罪。不可掩矣。不得爲而遂無所爲。何貴乎有康濟之略。謂是勢之無可如何也。無可如何之勢。忠臣以之盡瘁。鄙夫卽以之養奸。若之何浚民之生爲。

大夫養好地也。且有可爲而終無所爲。何貴乎有明哲之謀。謂是情之必不得已也。必不得已之情。烈士以之殉身。僉壬卽以之誣祿。若之何斂民之命爲大夫誣祿計也。然而幸也。大夫其猶知乃罪也。進無以匡時。退無以潔已。惟此引咎難安。猶足愧包羞集誥之倫。然而惜也。大夫其僅知乃罪也。進無以匡時。退無以潔已。雖或撫躬自悼。卒成夫玩世詭時之學。嗚呼。此距心有距心之罪。不得上歸於王。故王亦自有王之罪。亦不得下移於距心也哉。

孟子謂蚺鼃曰。子之辭靈丘而請士師章。

首節

今旣數月矣。數月前。數月中。蚺鼃尚有寬解。旁人尚有觀望。卽從寬解觀望。盡頭處。轉出旣字來。數月日日有責任在。不是忽然。

言言卷二十一
一
瞥過真無可解脫。

用既字以吸下。人亦知之。但下文云未可以言與。不曰可以言矣。若吸可以言矣。則既字口氣極嚴極正。今吸未可以言與。則既字口氣極尖極冷。

齊人曰所以爲蜺蜺節

爲字只是別人事。擔在自己身上。見得極閒極懈。尚且如此耳。

曰吾聞之也節

真淳耀文大賢以爲齊者自爲。而言與去皆不必矣。評曲折反失當下當然之理。國君子之居人國也。有輕世肆志排難解紛之意。則不可受爵祿。爲其畫地爲限。不敢代庖也。評都是詭玩心術行徑。文彼國在可治可亂之間。吾亦置身於可進可退之介。高致妙用。莫過於此。齊人何足以知之。評是何足爲聖賢之高。

妙。孟子之畱齊。爲行道也。齊無學焉。後臣之實。則不足與有爲。故不受祿。而王猶足用爲善。故戀望不忍卽去。此孟子之仁義交至也。蜺。鼃一事。但就鼃言。鼃。齊人一論。則又就孟子言。孟子各有所常。無非至道。其發蜺。鼃也。初不爲齊。何況自爲。言外推論。謂其卽此有益於齊。而無傷於自爲。則得。若謂孟子以此爲齊自爲。則純是權術作用。非聖賢心事作爲也。篇中所言。竟是魯仲連論贊。與孟子毫無關涉。仲連戰國說客中之高手耳。詭時玩世之學。豈可與言仁義哉。

沈同以其私問曰。燕可伐與。章

齊人伐燕節

今以燕伐燕。何爲勸之哉。孟子終有戰國風氣。口角頗刻。

燕人畔章

陳賈曰王無患焉節

文南英文云云。**評**庸妄人貶駁聖人。偏有他許多庸妄計較。庸妄証據。看得聖人作爲極迂疎。又要爲聖人惋惜。出脫讀之令人絕倒。然且莫便笑。後世學者好以漢唐情事議三代。以私鄙心術揣聖賢。謂古今智愚不甚相遠。大都皆陳賈家奴耳。

又文文自記周頑民。殷忠臣。貶武王。護管叔。皆得罪於名教。不可不辨。**評**使殷可圖復以爲忠。則微箕之罪。上通於天矣。此極背理大不道之論。得此足破千古狂霧。

見孟子問曰周公何人也節

看周公第也四句。周公之過何等光明洞達。豈待後人爲之解說耶。蓋此時只宜有過。不宜無過。豎儒不具此識見。妄下一轉曰。其有過亦如無過。卽蚍蜉蠅蠛之論矣。

且古之君子過則改之節

文古人身履天下之不幸而卒不開後人援引之端。**文**王莽援周公曹操援文王曹丕援舜禹李密援湯武援者自援但無傷于古人耳。**文**反吾意以全名不如順吾意以全心。心全而名何恤焉。**文**古人之過多從順理來不從順意來順意則真過惡矣。**文**矯吾術以詭是不如率吾性以存非非存而是何傷焉。**文**此句好古人之非乃至是而不易明者也古人之過皆從理義上起不從心意上起理義有何過此有二種一爲真過一爲似過真過者知有未至看理義稍粗以爲是矣而未止于至善也似過者於理義極精而於尋常之迹違非庸人所易曉又不可以告人此古人處無可如何只有引爲已過其實盛德至善卽聖人之所謂權也只此二種終於理義得過故聖賢無時不

孟子語錄卷二十一
憂危惕厲而愈見其過多。惟釋氏本心自信其心無他。卽以爲無過。故其行猖狂亦不自掩飾。但以其不掩飾處自認爲率性爲真心。白沙名之曰天理。陽明名之曰良知。不知於理義不合處皆成大過。蓋卽此一點信心無忌憚之意。本體渾純是過。從這上面發揮出來。安有無過之理哉。

孟子致爲臣而歸章

季孫曰異哉子叔疑節

仕宦衣鉢梯媒。恬無足怪矣。近來舉許家傳。最精此術。不禁爲之三歎。

古之爲市者節

黃子錫文云云。處處是龍斷。箇箇是賤丈夫。世界平沉。此性不滅。不須改換排場。大家團團拍手。真所謂會哭不如會笑也。

孟子去齊宿於晝章

客不悅曰弟子齊宿而後敢言節

不是責客以安賢亦不是望王之聽客只是王無繆公使人之意則客非繆公左右之人旁觀作此閒周旋真是沒要緊卽謂客亦齊王親近之人然不能維持訓護於未行則亦雖人而不算人矣

何以子思之側有人便能安子思何以繆公之側有人便能安泄柳申詳寔發其所以然之故方見其人之必不可闕無人則不能安是反跌語

孟子去齊尹士語人曰章

夫出晝而王不予追也節

天下之民舉安此是聖賢大事因緣平生志業在此栖栖齊梁諸

國無非藉以行道。非欲興齊梁以代周也。故此句是其真實本事。不是大門面語。然作爲有本安天下之術。不出安齊安齊之功。須得王用王之用否。是在天命。逐步縮歸實地。不用一句敷張。方得孟子仁天下之心。不同功利之士。

東坡文勿謂予用齊僅一山高乘馬之篇也。**臣**用齊有王政本領在。排斥管晏。正是齊人病根。是孟子治法。

齊與天下一體。由齊及天下有次第。

天下之民舉安句。有仁者之心。有精微之學。有尊王之義。有天命之公。有設施次第之寔。有審時度勢之宜。不具此識見。寫不出子輿氏功業。

金聲文寬其情以畜君德。大其心以觀世變。云云。**臣**二意見望字中功用。是聖賢心術作爲。

孟子去齊充虞路問曰章

五百年必有王者興節

題極多窮秀才大言愈濶綽愈卑鄙緣其胸中純從時命起妄想何用知非僕微倖萬一耳不道孟子所信處只在天信天却只是信我若無知言養氣仁義禮智根於心本領此兩句亦與自家無涉看下文舍我其誰句便見此兩箇必字真是孟子屈頭肩大擔不是輕易打誑語從天字看破宗旨方與符命識緯說英雄者不同

下文時數平治專指王者而言若其間句止鋪張名世雖得自任之意然未欲平治則孟子之名世已在疑信之間矣處處根定王者王者興便是欲平治無王者便是未欲平治孟子之名世固可自必也

此句正要連上句看。方見其間兩字。亦非約略莫須之謂。

此必有。即從上必有爲斷。其間即從上五百年爲限。須與上句看得成一。又看得成兩始得。

異義

并上句說其間兩字。乃有著落。正義重名世。不重王者。名

世或先王者生。或與王者同時。而聞道先王者。故曰其間。蓋王者之所從學焉。而後臣者也。非王者與而名世爲之應也。孔孟雖不遇王者。而無損其爲名世之實。故孟子謂天未欲平治天下。舍我其誰。有後來漢高祖。猶祠孔子而尊其道。亦從學之義。後世王佐不聞道。故帝王之道。亦微可見。名世非必遇王者而後爲名世。若必遇王者而後信。則孟子之言荒矣。故子謂並上句說。乃有著落之評謬也。秀才眼孔低微。竭力要靠王者。擡舉不道古之名世。乃擡舉王者者也。

金鑑文云云。千子云不講名世。止講名世遇合之難。低徊感慨
洵矣。愚謂文之不濟。亦正在此。三代以來。因無王者。故雖有孔
孟程朱。不成名世。然必如此。然後當得名世二字。若漢唐以下。
止成得英雄君臣。不可云王者名世也。然其遇合之難。則名世
與英雄不異。故感慨低徊。亦復情深。然畢竟不講名世。便是本
領不同。自有沒交涉處在。

黃溥耀文古者撥亂反正。非獨其帝王能任之也。蓋必有仁聖賢
人。翼戴其世。而後功烈茂焉。**國**名世必王者師。翼戴只說得功
臣耳。**文**天之所授。不可強也。然大丈夫際此亦足矣。**國**粗氣醜
語。名世固無妄希天位心。亦未嘗不以浮雲視勲名也。

三代以下。一治一亂。亦猶是也。然其治亂皆氣數上事。非聖賢理
道上事。故漢唐以來。君相但可稱英雄。不足當王者名世之實。

名世必孔孟程朱其人乃足以教導王者。旋乾轉坤此非子房孔明之所幾。况攀鱗附翼因人成事之輩乎。若乘時賢能之相何代蔑有。以此當名世則不應三代後平治之運會反密且盛於三代也。

由周而來節

數時都從天降下民說來。方不同後代識緯之學。


陳際泰又今夫周何以過其曆也哉。謂功德有厚薄云云。**邵講**周過曆之故。又是別一話頭。此處數過言王者之不作。不是覲覲改革周命也。不然則孟子之志荒矣。其數指五百。不指七百餘過矣。乃指七百餘耳。五百年王者興。爲治亂常數。七百餘歲而王者不作。則亂靡有定。故聖賢以爲憂。若周過其曆。雖永命千年。正聖賢之所樂。又何爲不豫乎。後世英雄起草澤。奸人生窺

伺神器之心。乃有識緯符命之術。非孟子所云時數也。

符命識緯。便是後世欺天罔人作用。

夫天未欲平治天下也節

只要說出舍我其誰四字。未欲平治如欲平治。特反覆以決之耳。
若徒作悲天憫人之語。卽沒交涉。



呂子評語正編卷二十七終

呂子評語正編卷二十八

孟子滕文公上

滕文公爲世子章

章世純文人之所以自棄於下愚者。起於自菲薄。而遙尊聖賢之品。又見庸愚之若是徧天下也。則以多自慰。以同自証。遂安之爲固然。而不復可以有立。**註**天下學人大都犯此毛病。遂不可治。閒有不屑多同者。又走差性善外去。**文**君子欲破其無畏而進其奮志。未可以聖凡之平分論也。則莫若尊凡庸之性而抗之使高。**註**何嘗不是平分論。只是其本來一耳。豈孟子所得抗而尊之。**文**吾抗凡庸於聖賢。而人不能不疑。則吾說猶未全也。則又莫若抑聖賢之道。而退之使下。**註**以性善道一爲抑退聖賢之道。更不通可恨。其意終以性善之說爲不然耳。**文**吾抗

之使高。卽抑之使下。不必分爲兩樣。性善是孟子極至之論。其理本天。上下聖賢無以易。大力却只當孟子偶然造爲之已說。可然可不然者。至謂抑退之言。則是性善之上原有妙道。而孟子所言非其至也。其悖叛至此。而千子且以爲抗之抑之不必分兩樣。則豈聖人之道果可抗可抑者乎。使抗抑之說併而爲一。千子且以爲誠然乎。甚矣其謬也。同歸於不通也。

孟子道性善節

孟子平生本領盡在此二句。所謂舍正心誠意更無可對揚者也。兩句是孟子無假借無妝飾。平生樸實頭本色學問。一著揣測機鋒。卽遊士之口也。

孟子道性善言必稱堯舜兩句。只作一意併說爲是。下句總是發明性善實義。看下文道一。卽性善句。引成瞞三段。卽稱堯舜

句也。

此節是孟子一生大本領。兩句道理只一。而爲說各有指。皆立極之言。性善者理之極。堯舜者人之極也。知理之極。則不爲外說所淆。知人之極。則足以有爲而無暴棄之患。兩句原竝看。大士文誤認言必稱堯舜。句所以証明性善。遂謂堯舜之說止一偏。千子批謂罵孟子畢竟孩氣。總由性字未明耳。夫罵孟子豈僅孩氣哉。

論世多縱橫之策士。則所立談而取卿相者。每在計功謀利云云。**國**方見孟子此言。是滕世子破天荒平生未聞之語。**文**近世之智名勇功。總非聖賢所屑計。而惟循理去欲。可以爲謀國之基。**國**智名勇功。正是迂遠不切事情之論。**文**卽盛代之井田學校。亦非旦夕所得爲。而唯法古立極。乃以得養正之本。**國**

孟子言善卷二十一
此意更進一層。方知井田學校亦末務也。

性善堯舜固直窮本原。然正是接引庸衆以我固有之人皆可爲也。

性善反面只對性惡一宗。蓋凡爲異端。只要掀翻善字。故性惡之說。是其正宗。善惡混。無善惡。知其說之駭世而不足以統攝。故又遁此二宗。則惑亂益巧矣。善惡混者。故降善與惡同等。援善入惡。所謂落水拖也。無善惡者。故捨惡與善同滅。所謂予及汝偕亡也。總是極憎這善字。必欲打掉了乃得。看告子先本作杞柳之說。後遁而爲湍水。又遁爲生之謂性。其話頭有轉換。宗旨只一而已。後來謂無善無惡心之體。便是這狐精狡獪。別無他法。

世子自楚反節

獎許疑字。謂足與語道在此。人亦能言。但多說成世子真有辨難話頭。却不是當時相對機神。要知世子復來見面。坐立未定。不曾開口舉似。從何見他疑處。劈頭一句喝破。直令世子汗流下拜。此是孟子知言窮理盡萬物之情。當下薦機迅利處。孟子人與人豈有不一者哉。語道一非人一也。人如何一得堯與舜便不同矣。

成叻謂齊景公曰彼丈夫也節

三段總爲世子決道一之無疑。

一邊打破疑團。一邊便鞭策篤信力行。以見人皆可爲處。只引證三段。不下一指點語。而指點已在言外。

附孟子道性善節文

記大賢之告儲君。首發性善之旨。復引以盡性之人焉。夫性善之

說古今之所未發也。堯舜之盡性。又古今之所最尊也。孟子之告世子必以此。敬世子乎。悟之也。嘗攷禹謨言心而不言性。是性之名古未立也。湯誥言性而不言心。是性之理中古亦未明也。至孔子始明其理。然而繼善之言。則猶就造化言之也。相近之言。則已合氣質言之也。至子思則其理愈明矣。然而言天命猶未嘗直指其故。言盡性猶未嘗直指其人也。聖賢豈能異同損益於其閒哉。天下言性者少。則其言渾而全。言性者多。則其言尊而正。言性者大亂。則其言斷而盡。親而有據。勢使然也。於是孟子受業於子思而盡發其旨。當是時。天下言性者紛起。有謂性無善惡者。有謂性有善惡者。有謂性可忽善而忽惡者。至有謂性且本惡者。由其說。不至於胥天下而桀紂焉不止。孟子懼之。爲之明其理。且立其名。曰性善。而又爲之指夫全其理。且

實其名者。曰堯舜。嘗以此教弟子。待來學。蓋稱述不衰矣。至是
滕世子就見。乃卽以其說啓之。何歟。古之世子。其教始於深宮。
阿保之年。則固有之良。出於本然者。無損。由是進之以勲華。亦
但充其義而盡其類。故三公坐論而不驚。今則宦官宮妾而已
矣。習俗深。則必爲之返其原。不則本基旣失。而後此之敷施。何
托乎。抑古之世子。其業成於入學齒冑之後。則大同之量。習於
論說者旣深。由是極之以綏猷。亦止尊所聞而行所知。故五帝
程功而不讓。今則富強功利而已矣。趣向卑。則必爲之立其極。
不則規模旣隘。而繼此之法制安行乎。昔者嘗三見齊王。而不
言事。曰我先攻其邪心。是言也。猶此旨與。然而孟子不明其意
也。世子又一無所辨難也。而諄諄然。而嚶嚶然。但聞其委曲而
詳盡者。無非此理也。其指陳而引據者。無非此人也。約略記之。

則以爲道性善言必稱堯舜云。吾於是而知性善之說爲至精也。人之未生。此理自在兩間。兩間者善而已矣。而分而爲陰陽。陰陽皆善也。自毗陽而亢焉。毗陰而凝焉。兩間且有不善矣。而究不可謂所毗者非陰陽。則究不可謂所毗者非善也。化其毗者而善矣。惟天地實化之。天地亦僅全此善耳。人之既生。此理具歸一體。一體者善而已矣。而列而爲仁義。仁義皆善也。自過仁而兼愛焉。過義而爲我焉。一體且有不善矣。而究不可謂所過者非仁義。則究不可謂所過者非善也。正其過者而善矣。惟堯舜實正之。堯舜亦僅全此善耳。此其理雖盡悉其說。學士大夫猶或震之。況世子之問未深矣。而孟子以至震之說。加易震之人。以甚深之義。施未深之問。而且以難盡之語。試之以不盡之詞。信乎否邪。吾固知其反也。

滕文公問爲國章

孟子曰井田學校之學孟子於梁於齊皆略言之而獨於滕君臣反覆言之者何也蓋學校不難設井田不易行也國學校不難設井田不易行渠只見近時有學校而無井田故云耳不知今之學校非古之學校也古之學校亦必待井田行而後可設蓋其規制義指與井田相依與今學校絕不相同故易則均易難則均難不可分也文齊梁之國經界亂矣強宗貴族以百數遊士奸人以千數故日趨於兼并而滕無是也國父兄百官不欲許行陳相亂政滕未嘗無此患也文齊梁之國壤地廓矣田畝之多者幾及百同戶口之多者幾及千萬故甚難於整齊而滕無是也國整齊看其人立法作爲耳豈以多寡爲難易哉文齊梁之國潤澤難矣其賢者務於首功其不肖者湛於聲色故

先王之遺法。埽地俱盡。而滕無是也。**評**此所指齊梁與滕異處。得之。知此。可知孟子詳略之故。有先後。無異同也。**文**昔者荀悅之論。以爲井田不宜行於人衆之時。以高祖初定天下。光武中興之後。田廣人寡。尙可爲也。**評**本領不精。則必惑於枝辭鄙說。此駁雜之害也。**文**此言獨可行於漢耳。去古愈遠。則雖開國之時。亦不可行矣。**評**安得此悖道之言。王者豈終不作乎。謂繼世守成之君。難行則有之。然亦顧其人何如耳。眞聖人定不難。若開國之君。無不可行者。今謂漢以後去古遠。雖開國亦不可行。最是亂道。焉知天不生聖人邪。卽萬世無聖人。聖人之道不可易也。況從來開國之君。皆聰明有爲。其不能復三代者。皆輔佐之臣。本領不濟。不能導之止於至善耳。亦皆此種議論。陷惑深鍋。故本領日下。學者不可不先破此見也。**文**若乃無輕賦之法。

而徒欲推兼并之徒。則破壞富室。其又昔人之所戒哉。國若不講井田。輕賦亦止惠富室耳。孟子井田之說。略於齊梁而詳於滕。非爲滕易行而齊梁難也。齊梁之君。溺於功利聲色。嗜殺好貨。其志趣根本未正。故孟子三見齊王而不言事。曰我先攻其邪心。所以與齊梁言者。皆興起其行仁之本。而未暇及條目。然恒產九一庠序孝弟之語。未嘗異也。滕文公爲世子時。卽能就見孟子。聞性善道一之旨。不忘於心。其志趣根本已正。故及其問爲國。直告以條目之詳耳。然滕終不能有爲。孟子期之。亦止曰王者師。新子國。後世子孫有王者。而於齊梁。則曰不王者未之有。以齊王猶反手。正以仁政得勢而倍速。故齊梁易而滕難。孟子所謂仁政王道。只有井田學校。舍此更無他圖。只可惜齊梁之國易行而君無志。滕君有志而國不足行。若以滕文而有

齊梁之國。孟子之道必行。三代之盛復覩矣。後世儒者亦習於功利詐力之事。自先信仁政必王不及。只在時勢利害上商量。直謂王道難行。貶損以就後世苟且之術。旋且張大以爲此卽三代之意。蓋至是而二帝三王孔孟之道。漸滅欲盡矣。此永嘉事功之害。朱子闢之與金溪同。凡熟講史學經濟。未有不墮此坑塹者。雖陶菴之賢不免也。

文時至戰國。蓋封建將廢之日也。及諸侯之尙在也。而亟講井田。使其說曉然大明。則雖封建竟廢。而井田可以獨行於天下。**文**若廢封建而行井田。亦不必及諸侯之尙在。且旣廢則俱廢。井田安能獨行哉。**文**自時厥後。西漢有輕稅之名。文景有恭儉之實。而曾不一議井田。則過此無復可行矣。故生漢以後而言井田者。皆迂也。元魏始行限田。而盛於唐之口分世業。然自

楊炎作兩稅而兼并者不復追正。貧弱者不復田業矣。故生唐以後而言限田者亦迂也。井田迂則出於限田。限田又迂。必也輕稅乎。併冗官汰冗兵。使百姓之力得以稍舒。則亦今日之井田也。謂輕稅又迂。柰何。陶菴亦爲此言。何望於學者乎。封建井田之廢。勢也。非理也。亂也。非治也。後世君相因循苟且以養成其私利之心。故不能復返三代。孔孟程朱之所以憂而必爭者。正爲此耳。雖終古必不能行。儒者不可不存此理以望聖王之復作。今托身儒流而自且以爲迂。更復何望哉。若因時順勢。便可稱功。則李斯之法。叔孫通之禮。曹丕之禪。馮道之匡濟。趙普之釋兵。皆可以比隆聖賢矣。此所謂曲學阿世。孔孟之罪人。學者不可不慎也。

陳子龍文 民事之大者。曰井田。曰學校。夫今無井田。而民未始無

食惡在養民之必井田邪。畢竟不足食。即今無學校而國未始無士。惡在教民之必學校也。畢竟無士。天下之亂皆起於游食無業之民無位橫議之士。聖人知其然。設爲貢助徹庠序學校之法以馭之。此亦自戰國始有耳。聖人安得爲此而設。總不奈其離叛之說浸淫胸臆。侈然欲駕先聖賢之上而議其罪過。不敢直指斥也。則又從而誣之。以爲先王不得已嗚呼。是亦大亂之道也。

孟子曰民事不可緩也節

民事只農事。引起通章制產意。著民事二字。可見制度原以爲民。非爲君也。爲民正以爲君。又是轉一層語。此句實未及此。惟其爲民事。人君輒視之爲緩。而不知其不可緩也。

民事二字。近則農功。遠而制產取民井田學校通章都是。

不可緩。是王者仁心仁政所出。

豈爾于茅宵爾索綯。若兩句作兩通讀。便覺其緩。兩句作一氣讀。便覺其不可緩。

宵爾索綯。見得是日中未了之事。方無寸晷之遺。

引詩所以証不可緩。而詩語是冬閒乘屋。只在末句中。看出民間閒時他事勤渠。都只爲此事。乃見其不可緩之至。

民之爲道也節

恒產二字。已包後分田制祿。兼君子小人在內。然此處只就民說。是故賢君必恭儉節。

此節是制法之本。

此是下面十五節分田制祿總綱。由心德而推爲治體。由治體而極之制度。其閒煞有次第。有包攝。有綱目大小。有歸重本原。

恭儉各有義。雖曰養賢爲民。然分田制祿兩者並重。故又曰無君子莫治野人。無野人莫養君子。可互明。不可側并也。若云賢君欲儉而取於民有制。必先恭以禮下行之。亦大費支離矣。

禮制相爲表裏。

禮下二句。是恭儉之實事。亦是井田學校之實意。不則恭儉不過聲音笑貌。而下文井田學校等事。亦僅帝王之糟粕矣。

夏后氏五十而貢。節

三代授田多寡之數不同。耕斂賦稅之法亦異。但是取於民者。其實同是十一。實字對數。與法言。不與名字對。要之三代法數之異。本是理勢不得不變。非謂更姓開國。必改易名號以新耳目也。此皆後世私心議論。漢祖唐宗以來。只此一點心。祖述暴秦。嫡傳。憑他制禮作樂。總不能復返三代者坐此。讀書人不可不

知。

多寡諸解。朱子亦取陳徐二說爲近。或云。易姓改步。異名同實。田數無增。只尺放長短。以新其法耳。是將殷周聖王。都說做朝三暮四。欺詐之狙公矣。亦是後世心術不正之論。最害道。

三代井田制度。朱子謂此難卒曉。以周禮爲本。而參諸說證之。然恐終不能有定論。但不可不盡其異同耳。詳味其言。真見好古闕疑。無不知而作之意。又嘗云。今人讀書。欲卒乍如某也難。某煞用功夫來。乃朱子之所未詳者。而後人必欲取而論定之。其不至於穿鑿附會。非聖叛道如郝敬之解經。不止也。

三代王者更制。純是天理當然。不得不爾。若謂開國創制。有不襲之名號。便是後世私心。

艾南英文

好詳之過。其勢必至於簡。此夏商授田之法。所以變而

爲私田也。爲治者方患其太詳。而儒者猶思復古之道。嗚呼。亦愚矣。**評**患詳便不是王道。第詳須精當耳。復古之精當。何害。

龍子曰治地莫善於助節

有夏初之貢。有夏衰之貢。有周初兼用之貢。有周末虐取之貢。龍子所譏。猶指周以前之貢言耳。要之夏后氏之初。必無是弊。後王酌劑踵事加美。而貢之不善。乃見。亦從其弊後言之也。看後文。請國中什一自賦。則當時之貢。又非龍子所言之貢矣。

陳際泰文禹之貢。無有不善者。守祖宗之舊貢。足矣。不必助也矣。**評**無此理。禹活到這時候。也須變助。**漢**皇之後。不能不帝。帝之後。不能不王。此固世運之遷移。而非關於聖德之高下。**聖**帝王升降。亦不可謂德無高下。但不損其聖人之體耳。且龍子自論貢助之善否耳。非以此軒輊禹湯也。孔子擬行夏時。乘殷輅。奏

韶舞。豈非毀昭代哉。評者以爲善表白前人周旋夏后。秀才針孔眼睛。真著不得一些影子。可笑也。若謂不可十分抹煞貢法。則孟子國中什一自賦。已早斡旋矣。何待公等。在龍子此兩句中。却絕無周旋表白處也。且令下文如何說去。

稱貸是何等事。窮民明知而爲之。豪民明知而脅之。只緣有必取盈焉四字在上耳。

夫世祿節

李樂有世祿。則宜審乎世祿之所自出。使祿而出於公田所入邪。則厚乎臣者。仍不病乎民。固未嘗以損下爲益上。使祿而非出於公田所入邪。則取乎民者。始得厚乎臣。是不幾以厲民者病國乎。**評**公田世祿相爲表裏。與世祿非公田不可意。今日秀才巾箱本。皆有是語。試問公田世祿如何相爲表裏。世祿非公

田何病公田而世祿何利。則咋口不能道隻詞矣。讀是文便要
看其議論之精。莫作叫破四鄰云。我已從世祿折出公田便了
事也。

詩云雨我公田節

此節見孟子無中生有。善讀書引證之法。

此是孟子於無可憑據中。巧尋出憑據來。

公田只與貢對較。方合上善不善主意。

徹兼貢助。孟子就徹中指出助來。周字卽徹字也。

孟子原講行徹而推本於助。

孟子原勸滕行徹而極言助之善。見徹之妙正在助耳。看讀野節
自見。非欲廢徹而行助也。

每見人云。先王改制。以名新天下之耳目。而實則相因。是文武周

公以狙公賦芋愚人將聖王心術說壞大是害事蓋徹原貢助兼行後來助漸廢而貢加厲故孟子抑貢而申助謂徹法原以助爲主耳非徹卽助也

陳子龍文欲征私田者必先去公田去其公而皆縱民所自私則我可以擅賦之矣謂雖想當然語然型定如是看宣公稅畝可見故欲復徹亦必先復其助也

陳文我周自開關西土公劉有徹田之號而後世因之蓋已數世當是時商有盛王誰敢更其時制謂當時實是徹田之制想於助法酌劑其宜自不妨更改不似後世便以此爲逆節也文我周自征伐關陝文考有九一之法而周公大之漸於四海當是時文爲服事必不變其國典謂指陳周家情勢本末固宜但謂改徹卽叛商以明公劉文王之不然却是後來私心議論拘

於後世文法。褊小見識。當時聖人只以民事爲重。那有後世許多虛文忌諱。若云當商時不應更制。豈止徹田。如太王之立司空司徒。設臯門應門冢土。公劉之制三單京師。文王之出師類禡。何非帝制自爲。將盡責以僭擬邪。抑又有別說而經不足憑邪。故後世見識議論。不可以妄例三代聖人也。

顧麟士上文旣列三代之制。而引龍子莫善之說。以等差之。明是要公專行助矣。然獨奈何背周而從殷。故又引詩言周亦助者。蓋明其原未嘗背周以致其決也。按徹耕則通力。收則計畝。民得其九。公取其一。則當畊與收。皆一井之中。公田私田。只并混一處。然到得什而取一。則私田之中。亦卽有公田。畊私田者。便是助公田矣。故曰雨我公田。遂及我私。一田兩名。故一雨兩祝。詩人絕妙之辭也。雖周亦助。則是孟子說詩到絕妙處。○一井

之田。中公外私。此定制也。然曰通力計畝。則當耕與收時。自無彼此之別。蓋人情日奸。一日假令今以衆農通力。未必無偷惰不忠之虞。且合衆私以耕一公。鹵莽滅裂。苟簡卒事者。亦必比比矣。周之改助爲徹。未必不慮此。而究亦一助。異名同實也。**獨**雖周亦助。知非孟子臆解詩之說矣。楊氏云。徹者徹也。兼貢助而通力也。故孟子曰。請野九一而助。國中什一使自賦。八家皆私百畝。其中爲公田。所謂九一而助也。國中什一使自賦。則用貢法矣。此周人所以爲徹也。通者亦云徹者通也。言其通用夏殷貢助之法也。如此則通力計畝兩語。似未盡徹解。朱子又曰。此亦不可詳知。但因洛陽議論中通徹而通之說推之耳。向余兩人卽又推朱子之意。殆不足爲據。熟玩白文前後義自相連。

貫斷斷主是說雖余兩人之先後彼此又不嫌異同耳。評徹法前註云。一夫授田百畝。鄉遂用貢法。十夫有溝。都鄙用助法。八家同井。耕則通力合作。收則計畝而分。按此則徹之取義原以通用貢助之法。而其於用助則又稍變通力計畝之法。本註原兼二義。未嘗專以通力計畝盡徹解也。顧楊自生葛藤耳。至子常欲竟主通用貢助而廢通力計畝之義。乃据方里而井。節有中外先後之別。註爲周助法。余謂此節乃指井田形體及興鋤合耦之先後與殷助同者耳。旣曰周之助法則與殷之助必有別矣。曰惟助爲有公田則徹之公田必又有別矣。故二義不可廢一也。○雖周亦助。謂雖徹亦原奉助法。其井制略同而耕收少變。要是助法講究到至精耳。非謂但換名號而毫無更改也。看末後請野一節註云。周所謂徹法如此。又言大略潤澤則勸

請字定於徹法微有不同處。此文謂野用助國中用貢爲徹法而九一十一則孟子之所酌變。未知果如何。但云徹法九一在貢十一在助疑未必然。卽註謂當時貢不止十一。乃指徹法既壞時事。徹法用貢原止十一也。助法未嘗有十一之說。旣前註謂公田百畝中以二十畝爲八家之廬舍。一夫通公私田耕一百一十畝爲十一分而取一。則又輕於十一。亦未嘗云十一在助也。今欲發揮請字便硬埽徹法不妙。自是文人過火處。要之孟子卽於徹有所酌變亦是因精而益精耳。

此是周徹法却不純是周徹法。故孟子下箇請字。周徹亦井田九一。但公田斂法不同。故下箇而助字。徹兼貢法貢只是什一。後來加重爲自賦。故下箇什一字。助法善。必當復貢之名可不必復。故下箇自賦字。就滕壤而言。故下箇野與國中字。

請字是孟子經濟。

九一什一四字。孟子特地提出。是大宗旨。

徹田亦九一。但法非助耳。而字要有著落。

陳際泰交國中田之不可井者。未始不可耕。田之可耕者。未始不可授。未始不可賦也。有法於茲。什一使自賦云云。**國**此則滕人固知之矣。滕之國中。恐原自行貢。但未必自賦什一耳。且此句不是勸滕行貢。正是圓足上句行助。謂惟國中不便行助。故可行貢之自賦。但必須什一也。大意在行貢之不善。推出行助。非從助後變計爲貢也。文中似欲從新行貢法起。則失其義矣。孟子主意只要行助。雖周亦助。正謂雖徹亦助。國中用貢。助法亦是佐助之窮耳。

卿以下二節

禮翼權文圭田以五十畝爲斷。蓋頒祿有差等。固以別賢勞。而恩禮無厚薄。所以一孝思也。**註**恩意優渥。有限制。無計較。所謂法外意也。**文**餘夫以二十五畝爲斷。蓋服疇不逮成人。試之耕以觀作苦。俯仰無事經營。約其制以俟有成也。**註**先王之法。深悉民情如此。豈如後世丁口版籍。徒作徵科之具乎。

死徙無出鄉節

黃淳耀文云云。**註**在他處嫌生枝節。別義於守望句。却正見王制精微。井田封建。聖人爲中國生民慮至深遠。井田壞則兵法地利士氣民情俱壞。不止農賦之病。儒者不講。則王者何由而知乎。○守望二字。俗手只作防衛混語看過。經此一分疏。情事確然。故知天下義理。只是細細辨析不盡。却被邪說以簡易直截蒙蔽者多也。

方里而井節

助徹之義。上文已盡。此正實指井田形體之制。蓋助徹之妙。全在井制形體上。後世賦稅。未嘗不依傍十一作數。而取民無度。上下交病。終不能返於三代之治者。只此形體之制不講也。

井制斷不可不講。後世取民無度。其弊坐規制不定。易於遷就作奸耳。

止舉一井規制。而凡助徹之所以分田制祿養君子治野人之法。已無所不具。須從形勢事理切疏其義乃得。

此其大略也節

此略字。竝識大識小亦不可得。

以上數節是孟子事。此節是滕君臣事。界限甚明。程子向司馬溫公王介甫議論亦如此。

今人必云如何潤澤。則仍是孟子自己說。非在君與子之意也。

附請野節文

助不可不行。貢不可盡廢。通其意於徹也。夫井地之法。惟助當必
行耳。然貢亦有可兼者。以佐助之難行也。野與國中分治之。其
卽周徹之遺意也歟。且從來新進喜事者。好言變更。然不敢顯
畔祖宗之制。則必援返古之說。以售其私。而假借之術。其弊深
於蔑古。老成守法者。力持由舊。然不能參劑朝野之宜。則必執
非今之見。以絕其類。而矯激之過。其患卽復於從今。此帝王良
法美意。每壞於主張之偏甚者。不少也。惟審乎地之所不齊。因
乎時之所不悖。主古之善者。以兼行古之不善者。則善者固善
也。復古之不善者。去今之不善者。以濟古之善者。則不善者亦
善矣。如分田制祿。古法之最善者。助也。其不盡善者。貢也。兼善

不善而通之者微也。由古法之不善而爲今之尤不善者。假貢而爲今之自賦也。然則滕今日宜何從。三代之制互異。而其實從同。九一固取一。什一亦取一也。其爲善與不善。所爭止在因革損益之間。近世之號亦陽奉。而其實陰違。廢助固廢其九。一用貢亦廢其什一也。其爲不善之不善。所分直在仁暴公私之際。然則法古者。但得其九一什一之意而已矣。其詳不必盡合也。救今者亦去其廢九一什一之害而已矣。其名不必盡罷也。此其道宜仍夫徹之遺意而變通之。吾得而有請。嘗聞周制。國至四郊。爲六鄉六遂。凡十五萬家。都鄙則在鄉遂之外。所謂甸稍縣畺者也。其於都鄙也。爲之建其長。食采者也。立其兩佐貳也。設其伍。大夫五也。陳其殷旅士也。置其輔。府史胥徒也。隸之五十里。有如是之都鄙乎。則謂之野而已矣。其於鄉遂也。比長

里宰。下士也。閭胥。鄮長。中士也。族師。鄙師。上士也。黨正。縣正。下大夫也。州長。遂大夫。中大夫也。鄉老。鄉大夫。公卿也。滕之五十里有如是之鄉遂乎。則謂之國中而已矣。且古之都鄙也。叔伯之食邑在焉。公孤之采邑在焉。然且井牧其田野。是知世祿之必出於助也。於是小司徒制之。井邑丘甸。咸以四起數。則其體方正。方正則尤宜於助焉。滕之野。豈無沃衍之區。足煩經畫者乎。雖阡陌久更。而都鄙皆野人。則復古也易。此不可不亟正之者也。正之者。亦正其九一耳。而必復夫助焉。環而耕者。旣忘會斂之文。借而耕者。已受班秩之誼。如是而叔伯之所供。公孤之所御。庶幾其隆養也哉。抑古之鄉遂也。遂人以興耜利甿焉。里宰以歲時合耦焉。未嘗輸稅於郊畿。是知徹田之專行。夫助也。然而大司徒制之。比閭族黨。皆以互相聯。則其體奇零。奇零則

可通於貢矣。滕之國中。況有溝澮之界。久供任地者乎。雖良法貴一。而鄉遂依君子。則輸將也便。此其可以兼用之者也。用之者。亦用其什一耳。即可使自賦焉。尊其征者。猶因斂賄之名。寬其征者。已損多加之實。如是而利賸者。及乎老穉。合耦者。洽其室家。庶幾其徧德也哉。蓋助法之善。本無不可行之地。況又有野之平曠者也。蓋去國遠。則凶豐難察。故但行助。而縣正以敘賞罰。斂稼事。則亦無曠土惰游之患矣。或謂野兼山林陵麓。未必能通九一之規。不知隨地爲井。則隨地爲助。齒角羽鬪之利。此公於民而不損於民者也。又何疑助之難復乎。抑自賦之不善。本可以不行之道。而其如國中之錯壤何也。蓋去君近。則情僞易知。故可行貢。而司稼以年上下出斂法。則亦未嘗有定額取盈之患矣。或謂國中多闌閭朝市。豈其盡同什一之際。不知

國宅無征則非穀無貢。園廩漆林之異。此輕其無田而重其非田者也。又何慮貢之流弊乎。况鄉遂地寡而都鄙地多。則行貢自不及行助之廣。且九一數厚而什一數薄。則行貢又正用行助之寬。徹法雖未盡詳。而大義已略備於此。

有爲神農之言者許行章

首節

其徒數十人。不是數十人從許行。是許行要數十人從已。如山農心隱之毆拳納拜。專爲惑天下耳。今日講堂實繁。羣相鼓煽。大率類此。

陳相見許行而大悅節

賢者與民並耕云云。異端之足以惑世。彼亦自有說焉。不盡其說而漫欲闢之。恐反爲彼所笑也。

趙衍文云云。評先儒有言曰。做小人也須索性。此人必會作賊。正以其索性也。今之爲小人者。皆不索性者也。今之爲小人之文者。皆不索性者也。作聖賢議論。不曾痛快道得一句。作異端議論。也不曾痛快道得一句。然則今之爲人爲文者。皆賊所不屑者也。嗚呼。可哀也已。看此文見處。直透老莊之宗。方知許行立說。亦不是小小庸妄議論。道得他底底裏盡。正是自家底裏又精深耳。

孟子曰。許子必種粟而後食乎節。

許子破綻。只在以粟易之一句。

以粟易器械者節。

且許子何不爲陶冶。何不二字不是要他爲。正是明知其不可爲。又要他自己說出。所以不能爲之故來。

不說許子之不當如是。只問許子之何不如是。總要逼出他不可耕且爲也一句來。

然則治天下節

有大人之事。與下句只差一字耳。然此人字非猶下人字也。此事字非猶下事字也。卽此有字并非猶下有字也。

引古語雖六句竝列。而意止在勞心與食於人兩句耳。

當堯之時節

水道不合。一則古今遷變。一則孟子行文取大段。不屑屑作鄮道元也。

汝泗入淮。淮不入江。朱子已明云記者之誤。而豎儒必欲牽合附會。令人噦吐。

聖人不盡拘無事之知。而能平天下之險。**卽**卽有變通。

亦必因其自然理勢。仍行所無事也。

后稷教民稼穡節

堯舉舜。舜使益禹稷契。但根堯舜之憂說來。使字已到。明出暗出。有字無字。皆可不拘也。或云。后稷上無使字樣。以后稷直起爲妙。不成。后稷不受帝命而自行其教邪。到使契句。又須別增使字議論矣。

自舜使益以下。直至五穀熟而民人育。方一歇。此是聖人養民之憂。下人之有道也。四句。又與前天下猶未平。九句相對。聖人有憂之。與堯獨憂之句相對。使契爲司徒。與使益禹稷相對。乃聖人教民之憂也。故契爲司徒。另用使字起。而禹稷上不消加使字者。益掌火。上之使字。須讀斷。直貫至此也。

后稷教民稼穡教字。與並耕對。固是註意。然畢竟是言外疏解。

故註下一然字。時作每於言中自作箋辨。又似孟子爲誰下註脚矣。

陳際泰文。凡物過昵則狎。狎則褻侮生。凡物過昵則厭。厭則棄捐。亦生相敬如賓。卽有間矣。有間卽日新矣。**說**得好。夫婦離怨亦從無別來。**文**。凡物近於無恥者。則廉隅易於不立。凡物習於無恥者。則嚴憚易於不生。相敬如賓。卽不名之爲私欲。名之爲禮義矣。**說**可知。原不是私欲。以爲習近於無恥。猶是渾身私欲見解在。

勞來匡直輔翼教化之法已備。自得二句。又加鼓舞作新耳。德字卽上數句。非德性之德。故註作惠字。又恐人誤解作財惠。故又於答問辨明卽上文教化事。

自得在民。使之自得仍在司徒。故謂強有以使之者固非也。謂任

其自得之者亦非也。

聖人之憂民如此。論本節與聖人有憂之相照。似應單承命契一件。不知此句直從堯獨憂之說來。作一總結。則統承爲得也。憂民如此。緊與堯獨憂之句應。使禹稷契皆舜使之矣。此處復舉放勳之詞。正見大人勞心。堯爲重也。

憂民二字。是何等迫切。如此二字。包多少事件。

堯以不得舜爲已憂節。

此下三節。大意只是爲天下用心。不於耕耳。百畝農夫。分財教善。無名不與。總是文章賓客。黏著便滯。

堯舜之憂不同。不爲所得之人有多寡大小。蓋君相之職分不同。則其所憂之大小又有差。看上文堯獨憂之及舉舜舜使之等句。自明。

禹臯乃總舉之詞。益稷契卽在裏。非謂舜所憂不得止在禹臯。而益稷契不與也。

分人以財謂之惠節

此節正應繳前第六節爲天下得人應大人之事。仁字應勞心。爲天下得人者謂之仁。此不是贊歎堯舜之仁。只極言勞心爲天下之大耳。

總見勞心爲大人之事。得人二字。上文已盡。複衍便失。謂之仁三字。又非本義所重。贊頌亦非。

上文數憂字。是緊接勞心來。此爲天下三字。是緊接憂字落。得人二字。亦從此三字中生出。

此仁字以恩惠言。與論語如其仁之仁字同。

所謂仁者。原只是惠與忠之道耳。惟其要盡人而惠之。惠之。此其

法非得人不可。得人正所以爲天下也。所以必要得人之故。得人所以謂仁之故。其著眼只在天下兩字。天下兩字緊對上人字。

有天下。卽有天下之人。一世之人。自足以治一世之天下。特爲之得者。無其人耳。此堯舜之所以任爲己憂也。天下字與上人字對看。衆寡何如。仁字與上惠忠字對看。廣狹何如。是之不憂。更有甚事。

人不止是舜禹臯陶。自舜禹臯陶推去。所得之人。皆堯所得之人也。故曰堯獨憂之。然堯只要得舜。舜只要得禹臯陶。此之謂大人之事。有分殊。有理一。讀西銘便見得箇仁字完全。

堯得舜。舜得禹臯。禹臯以下至庶司。皆是勞心中人。但其勞心有大小耳。舜禹臯陶之勞心。皆爲堯得之而後勞。若未爲堯得。則

亦無從勞也。論至此。則堯憂爲更急。而勞心更大。

古今來。人主爲天下之心。有公有私。爲天下得人之事。有義有利。爲天下所得之人。有大有小。若一槩不論。只爲天下得人。便是仁。則漢唐以後。求賢察吏之君。皆可與堯舜比烈矣。

孔子曰。大哉堯之爲君節。

大哉君哉二段。貌甚冠冕。而其神甚空。只要引起不用心於耕耳。與此數語全沒交涉。

主意只說堯舜有所用其心。然語氣則要說堯舜豈無所用其心。句句要說得堯舜絕似無所用其心者。然後跌出下豈字來。蓋以上數節。正是此節道理。却做不得此節註脚也。

吾聞用夏變夷者節。

馬世駿云云。

評陳良楚產也。講周公仲尼之道。偏就膺懲尊攘。

而言。蓋舍此則周公仲尼亦無道也。人以爲批陳良之逆鱗。不知正得陳良之心曲耳。然又有說。居侏離之鄉。而曰我自悅。周孔而已。亦必無是理。所以爲陳良計。只有北學一法耳。許魯齋位列台重。而以爲悅考亭之道。吾未之敢信也。

昔者孔子沒節

周正之秋。乃夏正之五六月也。秋陽以暴之。卽似今人家晒物。必以三伏者爲良耳。非真秋也。

聖人道个似。便看得聖人分量不到極處。分量不到極處。便有可尙在。從此破入。言下言外。乃有神會。

曰夫物之不齊節

金聲文神農以前。無物可齊。自無物不齊。**國**必無是理。巢窟毛皮。皆物也。有天地。卽有物。卽不齊。此等議論。亦從二氏寓言得病。

文物之僞者。欲齊而情不可強也。**論**凡求齊者。皆僞妄不通之人。最怕分別。亦是至理。**文**一物而百其價。所以作物情而使之競者。正所以宣物情而定其平。**評**方見平價之說。亦不是小事。**文**以爲不如是而精良受屈。枯敗倖勝。卽一物足以干天地之和。**評**舉錯之理卽得。

墨者夷之章

異端之所以別於吾道者。只是無等殺。無等殺便無禮。無禮便無天。從此一串差去。彼以爲等殺之禮。聖人造作以教人。苦人而不知其爲天也。此是儒釋劈頭分路處。程子所謂本領不是者。此也。俗士猶云末異本同。三教合一。亦只坐不知天耳。

徐子以告夷子節

受字與親字不同。提一親字。便見一本之義。

且天之生物也。使之一本。原只在人理自然。不可強處。指出天使